

Stav Stručnog savjetodavnog tijela za imunizaciju Federalnog ministarstva zdravstva (SST za imunizaciju) u vezi rezultata provedbe Programa imunizacije u Federaciji Bosne i Hercegovine u 2025. godini.

4.6.2026.

Stručno savjetodavno tijelo za imunizaciju Federalnog ministarstva zdravstva izražava ozbiljnu zabrinutost zbog nedovoljnog obuhvata imunizacijom djece u Federaciji Bosne i Hercegovine u 2025. godini. Podaci pokazuju značajan zaostatak za ciljem od 95% (naročito za MRP cjepivo), koji je neophodan za održavanje kolektivnog imuniteta i zaštitu najosjetljivijih članova zajednice.

Stručno savjetodavno tijelo za imunizaciju Federalnog ministarstva zdravstva izražava zabrinutost činjenicom da još uvijek nije započela provedba programa imunizacije protiv pneumokokne bolesti u Federaciji Bosne i Hercegovine, uprkos ranije osiguranim pretpostavkama za njegovo uvođenje. Nadležne institucije bez daljnjih odlaganja trebaju poduzeti potrebne aktivnosti kako bi se uspješno realizirala nabavka, program što prije implementirao i omogućila zaštita djece od invazivnih pneumokoknih bolesti, pneumonije i drugih komplikacija koje se mogu spriječiti imunizacijom.

Stručno savjetodavno tijelo za imunizaciju Federalnog ministarstva poziva zdravstvene ustanove, donositelje odluka i roditelje da zajedničkim djelovanjem unaprijede dostupnost i prihvatanje imunizacije, kako bi se spriječila pojava i širenje bolesti koje se mogu učinkovito prevenirati imunizacijom. Jačanje povjerenja u imunizaciju i provođenje aktivnosti nadoknade propuštenih imunizacija moraju biti prioritet javnog zdravstva u Federaciji BiH.

Posebno se naglašava obaveza provođenja dopunskih aktivnosti imunizacije u skladu s važećom *Naredbom o Programu obveznih imunizacija stanovništva protiv zaraznih bolesti*. Ukoliko u bilo kojem kantonu ili općini u Federaciji Bosne i Hercegovine broj imuniziranih osoba koje podliježu Programu obaveznih imunizacija ne dostigne obuhvat od 95%, zdravstvene ustanove koje provode Program obaveznih imunizacija dužne su kontinuirano provoditi dopunsku imunizaciju sve dok se ne dostigne propisani obuhvat. Stoga je neophodno da svi nadležni domovi zdravlja, zdravstveni radnici i lokalne zajednice ulože dodatne napore u pozivanje i podsjećanje osoba koje su propustile redovitu imunizaciju djece, kako bi se osigurao potrební obuhvat imunizacijom i očuvalo zdravlje stanovništva Federacije Bosne i Hercegovine.